

51-bob. O‘zbekiston Respublikasi Tashqi iqtisodiy faoliyatining tovar nomenklaturasi

367-modda. O‘zbekiston Respublikasi Tashqi iqtisodiy faoliyati tovar nomenklaturasining asosiy qoidalari

O‘zbekiston Respublikasi Tashqi iqtisodiy faoliyatining tovar nomenklaturasi tovarlarning tizimlashtirilgan ro‘yxati bo‘lib, undan tashqi iqtisodiy faoliyatni davlat tomonidan tartibga solish maqsadida foydalaniladi va u tovarning raqamli kodli belgilanishini, uning nomini, o‘lchov birliklarini hamda izohlarni o‘z ichiga oladi.

O‘zbekiston Respublikasi Tashqi iqtisodiy faoliyatining tovar nomenklaturasi Umumjahon bojxona tashkilotining Tovarlarni tavsiflash va kodlashtirishning uyg‘unlashtirilgan tizimiga asoslanadi.

O‘zbekiston Respublikasi Tashqi iqtisodiy faoliyatining tovar nomenklaturasi belgilangan tartibda joriy etiladi.

O‘zbekiston Respublikasi Tashqi iqtisodiy faoliyatining tovar nomenklaturasi tashqi savdoni hamda tashqi iqtisodiy faoliyatning boshqa turlarini tarif va notarif tartibga solish choralarini amalga oshirish, O‘zbekiston Respublikasining tashqi savdo bojxona statistikasini yuritish uchun qo‘llaniladi.

368-modda. O‘zbekiston Respublikasi Tashqi iqtisodiy faoliyatining tovar nomenklaturasini yuritish

O‘zbekiston Respublikasi Tashqi iqtisodiy faoliyatining tovar nomenklaturasini yuritish quyidagilarni o‘z ichiga oladi:

- 1) O‘zbekiston Respublikasi Tashqi iqtisodiy faoliyati tovar nomenklaturasining andaza nusxasini hamda unga doir sharhlarni ishlab chiqish va saqlab turish;

2) O‘zbekiston Respublikasi Tashqi iqtisodiy faoliyati tovar nomenklaturasining, O‘zbekiston Respublikasi Tashqi iqtisodiy faoliyati tovar nomenklaturasiga doir sharhlarning va uni talqin etish bo‘yicha tasnifiy yechimlarning nashr etilishini ta‘minlash;

3) O‘zbekiston Respublikasi Tashqi iqtisodiy faoliyati tovar nomenklaturasining xalqaro asosiga doir o‘zgartish va qo‘shimchalarni, mazkur asosni talqin etishga doir xalqaro tushuntirishlarni hamda qarorlarni kuzatib borish;

4) O‘zbekiston Respublikasi Tashqi iqtisodiy faoliyatining tovar nomenklaturasiga o‘zgartish va qo‘shimchalarni ishlab chiqish, kiritish, shu jumladan bu o‘zgartish va qo‘shimchalarni mazkur nomenklaturaning xalqaro asosiga muvofiq ishlab chiqish, kiritish to‘g‘risida takliflar tayyorlash;

5) tovarlarning kodlarini kichik subpozitsiyalar darajasida aniqlashtirish;

6) ayrim tovarlarni tasniflash bo‘yicha bajarilishi majburiy bo‘lgan qarorlarni ishlab chiqish, tasdiqlash va e‘lon qilish.

O‘zbekiston Respublikasi Tashqi iqtisodiy faoliyatining tovar nomenklaturasini yuritish O‘zbekiston Respublikasi Tashqi savdo vazirligi tomonidan O‘zbekiston Respublikasi Davlat bojxona qo‘mitasi bilan birgalikda amalga oshiriladi.

(368-moddaning ikkinchi qismi O‘zbekiston Respublikasining 2017-yil 14-sentabrdagi O‘RQ-446-sonli Qonuni tahririda — O‘R QHT, 2017-y., 37-son, 978-modda)

369-modda. Tovarlarni tasniflash

Tovarlarni tasniflash:

O‘zbekiston Respublikasi Tashqi iqtisodiy faoliyatining tovar nomenklaturasini talqin etishning asosiy qoidalariga;

tasniflashning har qanday darajasidagi kichik subpozitsiyalarga doir izohlarga muvofiq amalga oshiriladi.

Tovarlarni tasniflashda Umumjahon bojxona tashkilotining Tovarlarni tavsiflash va kodlashtirishning uyg‘unlashtirilgan tizimiga, Mustaqil Davlatlar Hamdo‘stligi Tashqi iqtisodiy faoliyatining tovar nomenklaturasiga va O‘zbekiston Respublikasi Tashqi iqtisodiy faoliyatining tovar nomenklaturasiga doir tushuntirishlar tovar kodini uning xususiyatlari bo‘yicha aniqlashtirish imkonini beradigan qo‘shimcha material sifatida qo‘llaniladi.

O‘zbekiston Respublikasi Tashqi iqtisodiy faoliyati tovar nomenklaturasining bir xil talqin etilishini ta’minlash maqsadida bojxona organi ayrim turdagi tovarlarni tasniflash bo‘yicha qarorni chop etadi.

Bojxona rasmiylashtiruvida tovarlar noto‘g‘ri tasniflanganligi aniqlangan taqdirda bojxona organi tovarlarni tasniflashni mustaqil amalga oshiradi va ularning tasnifi bo‘yicha qaror qabul qiladi.

Bojxona organlarining tovarlarni bojxona maqsadlarida tasniflash bo‘yicha qarorlari majburiydir.

Bojxona organlarining qarorlari, ular mansabdor shaxslarining harakatlari (harakatsizligi) ustidan belgilangan tartibda shikoyat qilinishi mumkin.

